

飲三鍾幾度瑤池龍華會上諸仙珍席醉倒
霞觴玉皇御宴無我不成班行重陽會金蓮
七朶齋放神光

頌曰

淨皎皎圓明皓月朗朗水磨孤圓綠湛湛
碧潭現影韻悠悠物外天仙滴溜溜拈出無
有活潑潑放下周全轉瀉瀉水晶盤中赤酒
洒一片青天

頌曰

玉京山上一池水四面八方不得底若還認
得把舟人自然運入天宮裏

晉真人語錄

丹陽真人語錄

靈隱子 王明中集

早二

大定癸卯三月間始拜師於牟平范明叔庵
之南師曰汝從何而來僕對曰來自東武仰
師之德不以貨財為富恬然自得坐進斯道
乃聞其風而悅之願侍巾履伏聽一言師乃
欣然曰身年少漸學道之心不可得也良久
曰飢則喫飯去飯罷則打睡去一日師見僕
拱手而立方呵曰道人只要豁暢不可存體
面庵不是廨宇你又不是官長若却講俗禮
則交接去處古人云三山有侶人情淡四海
無家道義深不徒設也師每垂語曰學道者
必在自悟不悟者昏蒙所致故也欲發昏蒙
先澄其心在乎澄湛明了而已功到而成不
必叩請於他人是工拙坦然明白矣
師在東牟道上行僧道往來者識與不識必
先致拜從者疑而問之曰彼此俱昧平生何
用拜之師曰道以柔弱謙下為本況三教同
門異戶耳孔子言雖執鞭之士吾亦為之未
聞一拜之為一過

師言祖師素攻文章了道之後尤為敏給至
於藏頭拆字隱語聯珠略不構思常和人詩
有押節字者衆皆和畢唯祖師最後和云三
百六十金骨節衆皆歎服以為神仙語如今
誰能繼得除是磻溪公頗似步驟

師言祖師嘗到登州時頂笠懸鶻執一竿携
一鐵瓶狀貌奇古乞於市肆登州人皆不識
夜歸觀書一絕於壁一別終南水竹村家無
兒女亦無孫數千里外尋知友引入長生不
死門明旦拂衣東邁後數日郡守紇石烈邀
詣觀觀其題詩欵欵不已乃依韻和曰回首
三年別故村都忘庭竹長兒孫他時拂袖尋
君去應許安開一叩門

師言薄滋味所以養氣去嗔怒所以養性處
污辱低下所以養德守一清淨恬憺所以養
道名不著於簿籍心不繫於勢利此所以脫
人之殼與天為徒也

師曰酒為亂性之漿肉是斷命之物且須不
喫為上酒肉犯之猶可忍若犯於色則罪不
容於誅矣何故蓋色者甚於狼虎敗人美行

損人善事亡精滅神至於殞軀故為道人之大孽也

師曰昇平快活莫過於閑道人若住庵稍倦結一兩人作伴掛搭腰袋拖條拄杖且歌且遊撞着好山好水且為盤桓不可貪程途

師謂僕曰學道人要有終始不可半道而廢與他人作笑端況你是讀書兒豈不知凡人立身須著一般事業況為道者正是男子立身大事

師常書大字一聯與道友曰速把我山放倒急將龍虎穴衝開僕因問曰人我山始知龍虎穴敢問其方師笑曰天機未敢輕分付細細看賢悟不悟

師一日呼僕良久而赴問那裏去來僕對曰午總睡方足神情湛然床頭有莊子書一冊因拈而讀之所以不在此也師曰夫道要心契若復以文字繫縛何日是了期所以道悟徹南華迷更迷

師在華亭曰道者何物也祖炁便是根源豈不知鼻中出者也豈不聞廣成子曰丹竈河車

休砣砣鶴胎龜息自綿綿師語衆曰學道專一則人人可以為仙不同世俗之進取有黜落也儒則博而寡要道則簡而易行但清淨無為最上乘法也

師居環堵中但設几榻筆硯羊皮而已曠然無餘物早晨則一碗粥午間一鉢麵過此已往果如不經口一日召僕入命坐良久僕問曰吾師之道有作為否師曰無也雖歌詞中每詠龍虎嬰姪皆寄言爾是以要道之妙不過養炁人但汨沒利名往往消耗其炁學道者無他務在養氣而已夫心液下降腎氣上升至于脾元炁散不聚則丹聚矣若肝與肺往來之路也習靜至久當自知之苟不養炁雖挾泰山超北海非道也此言未化前十日所說也僕與曹劉二三伴在環堵外立忽

出曰夫道但清淨無為逍遙自在不深不着此十二字若能咬嚼得破便做箇徹底道人但信老人言之自當有益必不誤你諸年少

師在黃縣西郊馬從仁庵內唱曰縱日消萬

兩黃金正好藤衣淡飯言去歲過外關聞人論此語喜其有理故記之不知何人作有馬元之曰此語是順長老葦江集中語也師言奇哉是言也

師言家風誰是祖鍾呂自親傳頌曰一點靈光晃太虛丹青妙手莫能摸休將明月閑相比有闕因緣怎類吾此語稍露鋒芒矣師曰炁之難御迅若遼馬唯靜者為易必去其外慕雖親紛華之在眼前正如深山窮谷中方是道人心腸儻不到無心地面莫能制

御是知道者貴於無心也師又云心定則情忘體虛則炁運心死則神活陽盛則陰消自然之理昧者不知但以爲子孫計返以學道者為無益何不思之甚也師曰予年四十餘方遇師入道所以鬢皤然腹中別有一紺髮者何由致之向往關中十餘年所養神炁耳譬如空谷中有呼之者隨呼而應之豈別物哉但其中沖虛故也吾友不信誠靜處養之當自知之

師言海蟾公本燕國相一旦悟道乃絕家累

其詩有地離火宅三千口屏棄門兵百萬家
之語後但乞食自資逢場作戲至與娼妓家
擔酒携榼不以為恥後來一等學道者言我
從富貴中來你比他海蟾公不著

師曰清靜之道人能辨之則盡善盡美矣故
經云人能常清淨天地悉皆歸言天地者非
外指覆載之天地也蓋指身中之天地也人
之膈已上為天膈已下為地若天氣降地脉
通上下冲和精氣自固矣此小任仙所說也
師曰守炁妙在乎全精尤當防於睡眠方欲
寢時今正念現前萬慮悉泯歛身側卧鼻息
綿綿魂不內蕩神不外遊如是則炁精自定
矣

師曰儒家云以德報德以直報怨昔真人云
以信結友以恩復讎可謂至矣
師在萊州時有姜禧者携呂公傳呈師師讀
到世人惟務名之與利不知身之有神遂物
不返喪盡天真其誰咎矣師乃掩卷謂禧曰
此語實中理矣然世無悟者何道之難行也
有韓洵字清甫慕陶淵明邵堯夫為人號安

樂園公師自關右還東牟道過濟南邀師到
園中供以素飯既畢洵叩首於師曰洵自初
歲慕道今已垂白幸遇我師願垂一語以燭
愚蒙

師答曰夫道以無心為體忘言為用以柔弱
為本以清淨為基若施於人必節飲食絕思
慮靜坐以調息安寢以養炁心不馳則性定
形不勞則精全神不擾則丹結然後滅情於
虛寧神於極可謂不出戶庭而妙道得矣韓
謝曰大道鴻濛無所扣詰今聞妙論得其門
而入矣曹萊二公本儒生也嚙儒學道多年
莫逆常從容而問曰師在關右時如何辨道
曹萊答曰師父冬夏披一布懶衣食粗取足
隆冬雪寒庵中無火兼時用冷水其神炁和
暢殊無寒意如此十年非腹中有道炁則不
能枝梧矣

師曰凡事必當有備則無患故為道者於少
壯之時防其情欲早為之備則神仙可冀若
素髮垂頰志氣衰憊始欲學道譬若大寒而
後索衣裘不亦晚乎

師曰三十六道引二十四還丹此乃入道之
漸門不可便為大道若窮於爐竈取象於龜
蛇乃無事生事於性上添偽也此皆候人之
甚矣故道家留丹經子書千經萬論可一言
以蔽之曰清淨

師曰清淨者清為清其心源淨為淨其炁海
心源清則外物不能撓故情定而神明生焉
炁海淨則邪欲不能干故精全而腹實矣是
以澄心如澄水養炁如養兒炁秀則神靈神
靈則炁變乃清淨所致也若行有心有為之
功則有盡之術法也若行無心無為之理乃
無盡之清虛也

師曰無為者不思不慮也愛欲嗔怒積畜利
害其間雖有為而常無為雖涉事而常無事
何況專一清心淨意養氣全神飄遊於逍遙
之地入於無何有之鄉
師曰劉高尚居瑛塔四十年別無他事但虛
其心實其腹去其華忘其名棄其利清其神
全其氣丹自結仙自成乃有讚之曰塞其兌
閉其門昔誦此語今見斯人可謂簡且當矣

師曰無心者非同猶狗蠢然無心也務存心於清淨之域而無邪心也故俗人無清淨之心道人無塵垢之心非所謂俱無心而與木石猶狗一般也

師曰不生滅見如來悟了之時免却再投胎丘君曰此乃出陰神若到天庭忽有雙華飛方出陽神此乃初地也

師曰大道人情遠無為妙本基世間無愛物煩惱不相隨

師曰修行人功行未滿大限到來聖賢不教死若不做修行人大限到來免他不得

師曰一念勿絕一世休冀道昇問曰湛然常寂時如何師答曰將來和湛然都不用

于清風問曰修行數年道眼不明心地不靈何也師曰別無他事行道不精爾

師曰一切男女從無始已來為有種種愚愛貪欲不出輪迴世界一切胎卵漏化種種性相皆因愛欲而生性命性因愛而生命因欲而有皆因愛欲而起逆順生嫉妬從此輪迴綿綿不斷法言欲淨其土當淨其心若心清

淨輪迴自息

師性嗜撥粥午間則啖一鉢畢與人談道訓誘後進不倦師蓋性慈善君子也在萊陽時作長短句有一餐鉢粥罷須辦十分功之句學者省此徒飲食端坐不以道為事者其譴累故可知也

師言學道者不須廣看經書亂人心思妨人道業若河上公注道德經金陵子注陰符經二者時看亦不妨亦不如一切不讀書虛度地氣氣最為上策

師言學道人行住坐卧不得少頃心不在道行則措足於坦途住則凝情於太虛坐則勻鼻端之息睡則抱膝下之珠久而調息無有間斷而終日如愚方是端的功夫非干造作行持也

師曰凡初學道者自今日已往俗事不得掛心若有纖毫未除則道不固既往事不思未來事不念且據目前為見在便是無事人師又言道人不厭貧貧乃養生之本飢則餐一鉢粥睡來鋪一束草繼繼續續以度朝夕

正是道人活計故知清淨一事豪貴人不能得

師過青社有邀師齋者在坐有衲僧數人其中有一僧騁其博辯以言詰難紛紜不止師徐言答曰倘除一身外餘事皆不知其僧赧然失色不能措辭

師曰凡作道人須是剛腸男子切莫狐疑不決但念性命事大力行不退期於必成若兒女情多煙霞志少非所謂學道者也

師曰身中之炁不可散心中之神不可昧或問曰何由得氣不散師曰身無為又曰何由得神不昧師曰心無事又曰身心如是可住

庵否師曰既處置得下便好休歇去

師曰道人心性塵俗之事切莫隨逐若拖條蓑杖嘲風詠月陶冶情性有何不可至於巡

門求乞推來捨去恰是道人日用家風也

師言你每初入闕時乞得一頓飯便喫一頓今則你每功行少也揀好處佳揀好食喫將來成道則休不了却索還債去

師曰我初到闕中乞化到一酒肆有一醉者

毀罵之間後被他贈一拳便走攪住又打一拳只得忍受汝曹曾遭此魔障否弟子答曰無師父云好好過着勿諱

師言祖師道不得着好衣不得喫好飯唱歌打令只要心頭物物不着

師言我嘗在俗中時料肉斟酒今已戒之十數年矣若食酒肉亦做神仙只是較遲了夢若心不懷道又嗜酒貪癩徒羨口腹罪報難逃終為下鬼之類也

師言祖師引四人謂丘劉譚馬也看任風子於好德祖師云倘聞之塞破耳及乎見了尚握着珍寶不敢放動劉師叔亦嘗言之

師言嘗在環裏恩閑話論及新瓜道衆聞之明日造瓜包子入環食了三枚罰了三日不得喫飯

師言祖師嘗使弟子去寧海乞化夢小錢未我要使用弟子道教別箇弟兄去後如何弟子有願不還鄉裏祖師怒打到平旦而止打之無數吾有退心謝他丘師兄勸住迨今不敢相忘

師言在鄉時祖師令弟子入萊州乞化到數日意猶遲疑夜夢師曰來日長伸着手做條好漢上街展手初來心障退故師曰回鄉中初上街祖師合總一頭小角兒面上以胭脂搽之私心云不怕撞着兒女相識只怕撞着

親家每思到范明叔宅欲少歇見太親先在宅中自云這迴休羞麼弟子問許真君上昇傳云後一十二百四十年間當有八百人登仙如何師曰祖師曾言教萬人俚王子仙又說來

師曰張閻子有一句甚好每道話往來但要照顧潤身之寶師自笑曰他開鋪席說話却是勸別人師曰百不歇十勸非倘自出意亦是祖師曾說過之話因而成之也

師言大抵人多是自諱俱能已勝往往不肯恭順於人

師言路上拾得驢契祖師直打到曉頭面上拳打有甚數目也師言人尚不信倘于清風日是他有信者師微晒之甚大成云師父如此行止尚人信清風曰一箇信者一仙人緣

此不信
師曰深藏白雪非為怪廣積黃芽不屬貪言畢笑曰如何好麼又曰夢裏鑄成無影劍法中去了有精心又曰瑤池殿下青鸞舞闌苑官中白鶴飛師還海上人家皆嚴持齋戒投依五會乃祖師所立師童聞馬師在登郡時會衆百餘人白師曰弟子等各沐浴靜居及戒斷葷酒已七日矣願隨清會祈福以消來業

師曰善公等清淨七日尚言有福馬風門人箇箇終身清淨純嗜欲斷葷酒福且多矣會衆皆禮拜嘆曰清淨之教實不可思議自是三州之人比屋受教漸及十方聞風信嚮大教重興自師而始

師問衆門人曰一日幾箇時辰門人對曰一日六箇時辰師曰晝夜總幾箇時辰門人曰晝夜總十二箇時辰

師曰晝夜十二箇時中天道運行斡旋造化還有頃刻停息否門人對曰無停息

師曰凡學道之人切須法天之道斡旋已身

中造化十二時中常清常淨不起纖毫塵念則方是修行日就月將無有間斷次做神仙苟或虧功失行怎得了達我觀汝輩十二時中不曾有一箇時辰專心在道受了十方施主供養如何還得一朝合眼復入輪迴何時出期我今叮嚀說與汝等但自澄心遣欲萬緣不染神炁冲和便是道也依此修行不得到錯了若因循怠墮行持不到非吾罪也豈不念汝等七祖生前造諸惡業冥中受諸罪苦望子孫成道救拔得生天各宜以此為念發堅固心抱道而死此吾所願也珍重門人聞是慈音皆惓然自得競加勉勵焉

師謂衆曰道無形名是神炁之祖也元炁降化神明自生鍊神合道乃是修真其餘名相紛紜難為憑準我念為汝舉其大綱夫修此之要不離神炁神炁是性命性命是龍虎龍虎是鉛汞鉛汞是水火水火是嬰姤嬰姤是真陰真陽真陰真陽即是神炁種種名相皆不可着止是神炁二字而已欲要養炁全神須當屏盡萬緣表裏清淨久久精專神炁炁

冲三年不漏下丹結六年不漏中丹結九年不漏上丹結是名三丹田備九轉功成骨髓凝化血脉成真內完外溢光影徹明寂然不動應感無窮千變萬化生在立亡三萬六千神靈踊躍遊行天下三界司迎八難之中千凶萬毒莫能消亡至於大劫變化洪災四衝神滿太虛亦無所礙故天有時而崩地有時而陷山有時而摧海有時而竭凡有相者終劫於壞惟學道者到神與道合處則永劫無壞兼功及九祖昇上清矣

丹陽真人語錄



正一天師清微宗 道教學社

無為清靜長生真人至真語錄序 再三
我聞道在域中所宜馴致仙居象外不可苟求故樂天詩云若非金骨相不列丹臺名非種百千劫善根得三五一真之氣安能至此境哉今長生子劉先生賦是相藉是名昔遇重陽玉真人濟度點化出俗入道明識慧性了達踰通昨被宣詔見有詩曰昔年陝右先皇詔今日東萊聖帝宣再歲告歸官僚索詞云飄飄雲水却東萊太微仙伴星冠士正似陳希夷昔承宋眷辭返華山詔答云玉堂金闕暫喜於來朝岫幌雲軒遽求於歸隱此二大士之不羈各一明朝之擅美蓋營道同耳易地則然自先生躬還故里觀住太微箋注諸經祖述三聖以文章疎放以翰墨嬉游著編籍演教法遵釋氏重輕之戒造玄皇衆妙之門服宣父五常之行緝田宅發糶粟申申如也凡有述作競彫鏤以流傳新視聽於衆庶諷誦於人口薰陶乎民風知見者歸依頑鄙者俊改一日先生門人徐李二師遠來垂訪過溪館入愚齋息杖履之勞餽水陸之味